

- („Službeni glasnik BiH“, broj 13/13 od 19.02.2013. godine)

Na osnovu člana 251. stav (4) Zakona o osnovama sigurnosti saobraćaja na putevima u Bosni i Hercegovini ("Službeni glasnik BiH", br. 6/06, 75/06, 44/07, 84/09 i 48/10), ministar komunikacija i prometa, uz saglasnost Vijeća ministara Bosne i Hercegovine sa 37. sjednice održane 30. januara 2013. godine, donosi

PRAVILNIK O VIJEĆU ZA SIGURNOST SAOBRAĆAJA

POGLAVLJE I. OSNOVNE ODREDBE

Član 1.

(Predmet Pravilnika)

Ovim Pravilnikom utvrđuje se broj članova Vijeća za sigurnost saobraćaja (u daljem tekstu: Vijeće), način imenovanja predsjednika i članova Vijeća, kao i djelokrug rada.

Član 2.

(Djelokrug rada)

- (1) Vijeće daje mišljenje na Strategiju sigurnosti saobraćaja na putevima u Bosni i Hercegovini (u daljem tekstu: Strategija).
- (2) Vijeće razmatra izvještaje o sprovođenju Strategije i izvještaje o izvršenju Akcionog plana za provođenje Strategije i daje mišljenje o njima.
- (3) Vijeće učestvuje u pripremi politika, strateških, planskih i programskih dokumenata iz oblasti sigurnosti saobraćaja na putevima, koordinira aktivnosti potrebne za njihovu realizaciju i prati realizaciju, u skladu sa Zakonom i na osnovu zakona donesenim propisima.
- (4) Vijeće prati i analizira stanje u oblasti sigurnosti saobraćaja na putevima i o zauzetim stavovima, mišljenjima i donesenim odlukama obavještava sva tijela i organizacije u čijem djelokrugu je predmetna djelatnost.
- (5) Vijeće predlaže nadležnim tijelima i organizacijama mjere i aktivnosti koje je potrebno preduzeti, s ciljem unaprjeđenja sigurnosti saobraćaja na putevima.
- (6) Vijeće učestvuje u aktivnostima koje se provode s ciljem obrazovanja i informiranja javnosti i podizanja svijesti javnosti o značaju sigurnosti saobraćaja na putevima, kao i u drugim aktivnostima i akcijama koje se provode s ciljem prevencije i unaprjeđenja sigurnosti saobraćaja na putevima.
- (7) Vijeće donosi Poslovnik o radu Vijeća.

POGLAVLJE II. SASTAV VIJEĆA

Član 3.

(Sastav)

- (1) Vijeće se sastoji od 12 članova, a čine ga predstavnici nadležnih ministarstava i tijela koja upravljaju javnim putevima i stručnjaci za oblast saobraćaja na putevima.
- (2) Iz reda predstavnika nadležnih ministarstava i tijela koja upravljaju javnim putevima, članovi Vijeća su:
 - a) ministar komunikacija i prometa, predsjednik,
 - b) zamjenik ministra komunikacija i prometa,
 - c) predstavnik ministarstva Republike Srpske, nadležnog za sigurnost saobraćaja na putevima,
 - d) predstavnik organa Republike Srpske nadležnog za upravljanje putevima,
 - e) predstavnik ministarstva Federacije Bosne i Hercegovine, nadležnog za sigurnost saobraćaja na putevima,
 - f) predstavnik organa Federacije Bosne i Hercegovine nadležnog za upravljanje putevima,
 - g) predstavnik Brčko Distrikta Bosne i Hercegovine (u daljem tekstu: Brčko Distrikt BiH) iz ministarstva nadležnog za sigurnost saobraćaja na putevima ili organa nadležnog za upravljanje javnim putevima.
- (3) Vijeće ima pet članova iz reda stručnjaka za oblast sigurnosti saobraćaja na putevima.

Član 4.

(Kriteriji za imenovanja)

- (1) Članovi Vijeća iz člana 3. stava (2) tč. c), d), e), f) i g) ove Odluke imenuju se na prijedlog entitetskih vlada i Vlade Brčko Distrikta BiH.

(2) Za člana Vijeća iz stava (1) ovog člana može se imenovati lice koje:

a) ima najmanje VII stepen stručne spreme i to dipl. inženjer saobraćaja-drumski smjer, dipl. pravnik i dipl. inženjer građevine-smjer niskogradnja i

b) ima najmanje pet godina radnog iskustva na poslovima u vezi sigurnosti saobraćaja na putevima.

(3) Imenovanja članova Vijeća iz člana 3. stava (3) ove Odluke provodi se u skladu sa Zakonom o ministarskim imenovanjima, imenovanjima Vijeća ministara i drugim imenovanjima Bosne i Hercegovine ("Službeni glasnik BiH", br. 7/03 i 37/03), uvažavajući kriterije iz stava (2) ovog člana.

Član 5.

(Mandat članova Vijeća)

(1) Ministar komunikacija i prometa i zamjenik ministra komunikacija i prometa su članovi Vijeća za vrijeme trajanja mandata, a ostali članovi se imenuju na period od četiri godine, sa mogućnošću samo još jednog ponovnog imenovanja.

(2) Vijeće imenuje Vijeće ministara Bosne i Hercegovine, svojom Odlukom.

Član 6.

(Prestanak članstva u Vijeću)

Članstvo u Vijeću prestaje:

a) istekom mandata;

b) podnošenjem ostavke;

c) razrješenjem u slučaju ako imenovani ne obavlja ili nije u stanju obavljati poslove člana Vijeća.

POGLAVLJE III. NAČIN RADA I ODLUČIVANJA VIJEĆA

Član 7.

(Saradnja)

(1) Vijeće u svom radu saraduje sa svim organima uprave, institucijama ili drugim tijelima nadležnim za poslove sigurnosti saobraćaja na putevima.

(2) Saradnja se zasniva na načelima međusobnog dogovaranja i informiranja.

(3) Nadležna tijela i druge organizacije su dužni osigurati izvještaje, podatke i dokumentaciju potrebne za rad Vijeća, te pružiti potrebnu stručnu pomoć.

Član 8.

(Predsjednik Vijeća)

Predsjednik Vijeća predstavlja Vijeće, saziva sjednice i stara se o organizaciji rada i izvršavanju dokumenata Vijeća.

Član 9.

(Način rada i odlučivanje)

(1) Vijeće se sastaje najmanje dva puta godišnje.

(2) Organizacijsku, tehničku i administrativnu podršku radu Vijeća pruža Ministarstvo komunikacija i prometa.

(3) Način rada i odlučivanja uređuje se Poslovníkom o radu Vijeća.

Član 10.

(Izvještaji)

(1) Vijeće podnosi Vijeću ministara Bosne i Hercegovine i Parlamentarnoj skupštini Bosne i Hercegovine najmanje jednom godišnje izvještaj o stanju u oblasti sigurnosti saobraćaja.

(2) Vijeće podnosi Vijeću ministara Bosne i Hercegovine godišnje izvještaj o svom radu.

POGLAVLJE IV. NAKNADA ZA RAD

Član 11.

(Naknade)

(1) Članovi Vijeća iz člana 3. stava (3) ove Odluke imaju pravo na naknadu za rad čija visina se utvrđuje posebnom odlukom Vijeća ministara Bosne i Hercegovine, u skladu sa odredbama Odluke o kriterijima za utvrđivanje novčane naknade za rad u upravnim odborima, nadzornim i drugim odborima i drugim radnim tijelima iz nadležnosti institucija Bosne i Hercegovine ("Službeni glasnik BiH", br. 19/09 i 10/12), ukoliko nisu zaposleni u organima uprave na bilo kojem nivou vlasti u Bosni i Hercegovini.

(2) Članovi Vijeća imaju pravo na naknadu putnih troškova za dane prisustvovanja sjednicama Vijeća, obračunatu na osnovu vrijednosti pojedinačne karte na relaciji mjesto rada/prebivalište člana Vijeća-mjesto održavanja sjednice Vijeća, utvrđenoj linijskim prijevozom.

(3) Članovi Vijeća nemaju pravo na naknadu iz stava (2) ovog člana u slučaju kada, po osnovu rada u istom za dolazak na sjednicu Vijeća, koriste službeno vozilo institucije u kojoj imaju reguliran radno-pravni status.

(4) Naknada iz st. (1) i (2) isplaćuje se na teret Budžeta Ministarstva komunikacija i prometa.

POGLAVLJE V. PRIJELAZNE I ZAVRŠNE ODREDBE

Član 12.

(Postupak imenovanja)

(1) Ministar komunikacija i prometa, u roku od osam dana od dana stupanja na snagu ovog Pravilnika, pokreće postupak imenovanja članova Vijeća, u skladu s odredbama ovog Pravilnika.

(2) Vijeće imenovano Odlukom o imenovanju članova Vijeća za sigurnost saobraćaja na putevima Bosne i Hercegovine ("Službeni glasnik BiH", broj 5/10) obavlja dužnost do imenovanja Vijeća, u skladu s odredbama ovog Pravilnika.

Član 13.

(Stupanje na snagu)

(1) Stupanjem na snagu ovog Pravilnika prestaje da važi Pravilnik o Vijeću za sigurnost saobraćaja na putevima Bosne i Hercegovine ("Službeni glasnik BiH", broj 58/08).

(2) Ovaj Pravilnik stupa na snagu danom dobijanja saglasnosti od strane Vijeća ministara Bosne i Hercegovine i objavljuje se u "Službenom glasniku BiH".

Broj 01-02-2-5471-9/12

30. januara 2013. godine

Sarajevo

Ministar

Damir Hadžić, s. r.